

Transkript konferencije za medije međunarodnih organizacija



*Frane Maroevic OHR/EUSR
Maj. David Fielder EUFOR*

OHR:

Vlada RS-a odbacila pravne garancije

Nakon što je razmotrio zaključke Vlade Republike Srpske od 29. oktobra, OHR je konstatirao da ponovo nije ponuđen nijedan jedini argument ili činjenica koja bi ukazivala na to da Odluka visokog predstavnika o donošenju izmjena i dopuna Zakona o Vijeću ministara ugrožava interese srpskog naroda.

Shodno tome, i dalje je nepromijenjen stav OHR da nema potrebe da se povuče ili izmijeni Odluka visokog predstavnika.

Odluka visokog predstavnika je u potpunosti u skladu sa Ustavom Bosne i Hercegovine i ni na koji način ne ugrožava poziciju bilo kog entiteta ili konstitutivnog naroda.

Uprkos generalno pozitivnom toku sastanka pravnih stručnjaka prošle subote, OHR izražava žaljenje što Vlada RS nije prihvatila ponudu OHR-a da definira pravno tumačenje OHR-a kao autentično pravno tumačenje. Autentično pravno tumačenje je pravno prihvaćena klasifikacija koja bi se osvrnula na bojazni

srpskog naroda.

OHR je dao dovoljno prilika da se nađe rješenje i nemamo razloga da vjerujemo da političko vodstvo RS-a iskreno želi naći rješenje.

Sve ostalo je izazivanje vještačke političke krize koja može dovesti do kršenja Dejtona i izazivanja međunarodne zajednice.

U tom kontekstu dodao bih komentar na deklaraciju potpisanu u Mostaru. Kao što smo već rekli, ovo je pozitivan korak, no očekujemo brze sljedeće aktivnosti, to jest pripremu i usvajanje zakona.

Nije moguće ni razmišljati o evropskoj budućnosti u situaciji kada se prijeti nepoštivanju Dejtona, Ustava i zakona ove zemlje.

Narodna skupština Republike Srpske danas nastavlja svoju sjednicu, ali kako smo obaviješteni, Vlada RS je dala savjet da ne donosi bilo kakve zaključke dok ne prođe sjednica Vijeća za implementaciju mira što nas dovodi do druge tačke koju sam pripremio za danas.

Danas počinje dvodnevna sjednica Vijeća za implementaciju mira u Sarajevu

Upravni odbor Vijeća za implementaciju mira (PIC) na nivou političkih direktora će se okupiti u Sarajevu danas i sutra. Pravi je trenutak da se Vijeće za implementaciju mira sastane i ozbiljno razgovara o pogoršanju političke situacije u zemlji.

U toku svojih diskusija, Vijeće za implementaciju mira će razmotriti napredak koje su strane u BiH postigle u pravcu implementacije Daytonskog mirovnog sporazuma, posebno funkcionalnost zajedničkih institucija na državnom nivou,

nedostatak napretka u određenim oblastima, uključujući raspodjelu državne imovine kao i pozitivnije pokazatelje da lideri koalicije u BiH pokušavaju pronaći sporazum. Vijeće će također razgovarati o perspektivi zemlje da se pridruži EU, što je trenutno blokirano, ali se tračak nade u tom smjeru pokazao u Mostaru u nedjelju.

Očekujemo da će politički direktori voditi ozbiljnu diskusiju o situaciji u BiH. Vijeće za implementaciju mira će se susresti sa liderima političkih stranaka koje čine vladajuću koaliciju na državnom nivou te sa Vijećem ministara.

EUFOR:

Sastanak Komandanta EUFOR-a i ministra sigurnosti BiH

Komandant EUFOR-a, kontraadmiral Hans Jochen Witthauer i ministar sigurnosti i zamjenik predsjedavajućeg Vijeća ministara BiH, Tarik Sadović, održali su sastanak jučer popodne u kampu Butmir na kojem su razgovarali o trenutnoj političkoj i sigurnosnoj situaciji u BiH, te potrebi da sve strane u BiH poštuju Dejtonski mirovni sporazum. Složili su se da, usprkos trenutnoj političkoj krizi, sigurno i stabilno okruženje nije ugroženo. Razgovarano je i o pitanjima kontrole kretanja municije i naoružanja, koji su u okviru mandata EUFOR-a. Komandat EUFOR-a je naglasio da su "postojeći kontrolni mehanizmi od izuzetnog značaja za sigurno i stabilno okruženje. EUFOR želi ovu funkciju predati centralnoj vlasti u BiH, a traži se podrška svih političkih stranaka da bi se usvojili neophodni zakoni iz ove oblasti".

EUFOR smatra da nekontrolirano prisustvo naoružanja i municije i dalje predstavlja ozbiljan problem u BiH. Za sprovođenje mira na osnovu Dejtonskog sporazuma potreban je centralni organa nadzor kretanja naoružanja i municije koju posjeduju civili u BiH, a trenutno je to EUFOR. Saradnja bh. vlasti i EUFOR-a rezultirala je otkrivanjem značajnog tajnog skladišta

naoružanja prošle sedmice koje je potom predano lokalnoj policiji.

Komandant EUFOR-a je ponovno istakao da "lokalna odgovornost ostaje vodeći princip. Moj cilj je osigurati kontroliranu primopredaju funkcija EUFOR-a na odgovarajuće organe vlasti BiH".

Pitanja novinara:

Večernje novosti, Dušan Stojaković:

Zanima me ukoliko Vlada, odnosno institucije Republike Srpske ne prihvate Lajčakovemere kakav odgovor priprema OHR i kakav će odgovor biti ukoliko SNSD ili predstavnici Republike Srpske izađu iz izvršne vlasti?

OHR/EUSR, Frane Maroević:

Mi smo spremni na sve situacije. No, kao što već znate odgovor je da ne špekuliramo o našim budućim potezima.

Oslobođenje, Antonio Prlenda:

Šta sutra od PIC-a očekujete prvi dan nakon ovog sastanka sa članovima koalicije? Hoće li biti neki mali 'pred-komunike' ili nešto za javnost? Šta očekujete uopšte?

OHR/EUSR, Frane Maroević:

Ne. U principu, rezultat kao i svaki put biti će obavještenje na kraju samog PIC-a. Neće biti ništa prije zaključka. Ali kao što sam rekao očekujemo jedan vrlo ozbiljan razgovor i unutar

samog Vijeća za implementaciju mira i sa političkim liderima Bosne i Hercegovine.

RTRS, Škipina:

Da li će u okviru ove rasprave povesti se i rasprava o bonskim ovlaštenjima visokog predstavnika kao posebna tačka ili u okviru svih ovih nabrojanih tema će se razgovarati i o bonskim ovlaštenjima u okviru kojih je visoki predstavnik i donio najnovije mjere?

OHR/EUSR, Frane Maroević:

Bonska ovlaštenja su vrlo jasna. Dejtonski sporazum je vrlo jasan. Ne vidim potrebu za diskusiju o tome.

Večernje novosti, Dušan Stojaković:

Još jedno pitanje. Izvinjavam se što privatizujem konferenciju. Znači, koliko je moguće da BiH potpiše Sporazum o stabilizaciji i pridruživanju na osnovu Mostarskog sporazuma?

OHR/EUSR, Frane Maroević:

Prvo što se tiče tog sporazuma procjenu će donijeti Evropska komisija, koliko je on u skladu. No ja mislim da svi pozdravljaju to kao jednu vrlo dobru inicijativu da se pokrene proces i ključno je da se krene sad u izradu daljnjih akata, zakonskih akata koji će onda to i utvrditi. Ono što je Evropska unija uvijek govorila je da traži napredak na tom cijelom procesu. Ovo je deklaracija i očekujemo da se sad krene što brže u izradu tih zakonskih akata kako bi se taj

cijeli evropski put pokrenuo.

Dnevne novine «SAN», Amela Žigo:

Mene zanima jedna druga stvar pošto smo jučer imali kontradiktorne informacije vezano za vraćanje lične karte Dragomiru Andanu. Da li je OHR provjerio informaciju da je MUP Republike Srpske vratio ličnu kartu Andanu obzirom da je njegov advokat Emir Karača jučer potvrdio da se to desilo?

OHR/EUSR, Frane Maroević:

Mi nismo upoznati sa bilo kakvom odlukom Ustavnog suda o tome i vidjeli smo također jučer u medijskim izvještavanjima da je direktor policije Republike Srpske javno izjavio da mu nije vraćena karta. Ministarstvo unutrašnjih poslova Republike Srpske je zaduženo za to pitanje. Tako da možete njih kontaktirati, ali su oni to već jasno izjavili.

Hvala vam.